

ADMINISTRACIÓN LOCAL

MUNICIPAL

MARÍN

Outros documentos, notificacións e informacións públicas

APROBACIÓN DA INSTRUCCIÓN DA APLICACIÓN DA "ORDENANZA MUNICIPAL REGULADORA DAS INSTALACIÓNS E UTILIZACIÓN NA VÍA PÚBLICA DE MESAS, CADEIRAS E INSTALACIÓNS COMPLEMENTARIAS QUE CONSTITÚAN ACTIVIDADES DE HOSTALERÍA CON FINALIDADE LUCRATIVA"

ANUNCIO BOP

En data 30.04.2021 por Resolución de Alcaldía aprobouse a Instrución da aplicación da "Ordenanza Municipal reguladora das instalacións e utilización na vía pública de mesas, cadeiras e instalacións complementarias que constitúan actividades de hostalería con finalidade lucrativa (BOP nº 17 de data 27.01.2014).

Tendo en conta o disposto no artigo 6.1 da Lei 40/2015, do 1 de outubro, de réxime xurídico do sector público, PUBLÍCASE a continuación, o texto da mesma na súa integridade:

Instrución para o establecemento de condicións xerais para a tramitación de solicitudes de autorización de ocupación da vía pública mediante terrazas de veladores no Concello de Marín.

Mediante acordo do 11 de outubro de 2013, o Pleno do Concello de Marín aprobou a "Ordenanza Municipal reguladora das instalacións e utilización na vía pública de mesas, cadeiras e instalacións complementarias que constitúan actividades de hostalería con finalidade lucrativa (BOP nº 17 de data 27.01.2014).

En cumprimento do artigo 6.1, parágrafo 2º, da Lei 40/2015, do 1 de outubro, de réxime xurídico do sector público e do artigo 8 do Decreto 144/2016, de 22 de setembro, polo que se aproba o Regulamento único de regulación integrada de actividades económicas e apertura de establecementos (RIAE), procédese á elaboración da presente Instrución.



I. Memoria xustificativa:**1ª) Xustificación da necesidade e legalidade da aprobación dunha instrución de establecemento de condicións xerais para a tramitación de solicitudes de autorización de ocupación da vía pública mediante terrazas de veladores.**

A ocupación da vía pública con terrazas de veladores constitúe unha actividade económica de enorme importancia no Concello de Marín, non só para o sector hostaleiro local senón tamén para o propio desenvolvemento da economía municipal. As terrazas fan cidade, incrementando as posibilidades de lecer dos cidadáns, constituíndo un atractivo máis na promoción turística do municipio, e xeran postos de traballo e ingresos directos e indirectos que repercuten na calidade de vida da cidadanía. No contexto actual, de restricións á actividade da hostaleira por mor das medidas restritivas da mobilidade social adoptadas polas autoridades sanitarias a consecuencia da pandemia da COVID 19, a demanda de instalación de terrazas con veladores por parte de establecementos de actividades recreativas viuse incrementado notablemente, podendo afirmarse que en moitos casos a autorización da terraza de veladores vai constituír un elemento clave para garantir a supervivencia deste tipo de establecementos e, polo tanto, dunha parte importante do tecido económico municipal.

A instalación de terrazas ao aire libre ou na vía pública anexas aos establecementos abertos ao público, constitúe un dos supostos sometidos a licenza segundo o disposto no artigo 41.b) da LECEG.

Esta utilización especial dos espazos públicos require unha ordenación que regule este tipo de instalacións para que poidan desenvolver a súa actividade de xeito que se concilie o dereito ao ocio dos cidadáns e o dereito ao desenvolvemento da actividade económica, dunha banda, co dereito ao descanso da veciñanza e á utilización dos espazos públicos para o tránsito de persoas e vehículos, garantindo ademais que esa utilización sexa respectuosa coas normas medioambientais e urbanísticas aplicables. Esa ordenación debe realizarse a través dunha ordenanza municipal actualizada, da que actualmente carece o Concello de Marín, atopándose en proceso de elaboración.

Os cambios e modificacións lexislativas nos últimos anos no ámbito das actividades recreativas e de espectáculos públicos (Lei 9/2013, de 19 de decembro, do emprendemento e da competitividade económica de Galicia (LECEG), Decreto 144/2016, de 22 de setembro, polo que se aproba o Regulamento único de regulación integrada de actividades económicas e apertura de establecementos (RIAE), Lei 10/2017, de 27 de decembro, de espectáculos públicos e actividades recreativas de Galicia, Decreto 124/2019, de 5 de setembro, polo que se aproba o Catálogo de espectáculos públicos, actividades recreativas e establecementos abertos ao público da Comunidade Autónoma de Galicia e se establecen determinadas disposicións xerais de aplicación na materia ou a nova Orde de 23 de outubro de 2020 pola que se determina o horario de apertura e peche dos establecementos abertos ao público e de inicio e remate dos espectáculos públicos e das actividades recreativas); fai que sexa necesaria adaptar a obsoleta Ordenanza actual do Concello ás novas circunstancias socioeconómicas e normativas.



A tramitación desta modificación da ordenanza – que, pola súa relativa complexidade, requirirá dun alto grao de consenso entre as formacións políticas que integran o concello, así como da participación dos axentes sociais afectados e dos informes previos das distintas unidades administrativas municipais con competencias na materia – pode esixir un prazo entre catro e seis meses, nunha estimación realista, tendo en conta que se require un trámite de consulta pública previa á súa aprobación inicial (artigo 133.1 da Lei 39/2015, de 1 de outubro, do procedemento administrativo común das administracións públicas) e un posterior trámite de información pública de 30 días hábiles (artigo 49 da Lei 7/1985, de 2 de abril, de bases do réxime local). A este respecto, estímase legalmente posible e mesmo recomendable o establecemento, con carácter provisional, dunhas condicións xerais para a tramitación e outorgamento destas autorizacións, garantindo un mínimo de seguridade xurídica en canto aos ditos criterios e a igualdade de trato aos interesados na concesión das autorizacións en tanto se elabora e tramita a modificación da ordenanza.

O fundamento legal da utilización da figura dunha instrución de establecemento de condicións xerais é o seguinte:

1º) O artigo 6.1 da Lei 40/2015, do 1 de outubro, do réxime xurídico do sector público e o artigo 8 do RIAE, habilitan aos órganos administrativos para ditar instrucións e ordes de servizo, establecendo que cando se estime conveniente por razón dos seus destinatarios, esas instrucións publicaranse no boletín oficial que corresponda, sen prexuízo da súa difusión conforme á Lei 19/2013, de 9 de decembro, de transparencia, acceso á información pública e bo goberno. Esta norma habilita aos órganos de goberno locais a ditar instrucións sobre o procedemento a seguir para a tramitación dos procedementos, no marco das normas xerais de procedemento administrativo, así como para o establecemento de criterios de aplicación e interpretación da normativa vixente.

O obxecto da instrución, a partir das normas habilitantes citadas, quedaría delimitado polos seguintes ámbitos:

a) En primeiro lugar, as condicións xerais de instalación de terrazas de veladores con ocupación de vía pública (requisitos xerais, condicións de localización, condicións dos elementos integrantes da terraza de veladores, condicións de uso), concretando as ditas condicións conforme á normativa sectorial aplicable, tendo en conta a xurisprudencia na materia e a actual Ordenanza municipal.

b) En segundo lugar, as instrucións ás unidades administrativas implicadas para a tramitación dos expedientes.

Non cabe considerar a mera fixación desas condicións xerais como un acto de natureza normativa que implique o exercicio da potestade regulamentaria, debendo en cambio entenderse como un acto administrativo xeral, aplicable a unha pluralidade indeterminada a priori de interesados vinculados ao concello por unha relación xurídica senlleira (determinada pola concreta solicitude de autorización de ocupación), de modo análogo ao que sucede con outros actos administrativos xerais (como as bases reguladoras de convocatorias abertas de subvencións,



as bases de procesos selectivos en materia de persoal, as bases para adxudicación de postos de venda ambulante, os pregos de cláusulas administrativas para a adxudicación de contratos ou para o outorgamento de autorizacións ou concesións demaniais ou, en fin, as relacións de postos de traballo das administracións públicas). O que caracteriza á instrución, fronte a unha ordenanza, sería, por unha banda, a limitación do seu obxecto material ás condicións xerais de ocupación da vía pública así como ás instrucións de servizo para a tramitación dos expedientes (sen incluír outros aspectos que si esixen a súa regulación mediante unha norma – como é o caso do réxime sancionador, reservado a unha ordenanza conforme se deduce do establecido no título XI da Lei de bases do réxime local, ou a declaración de intransmisibilidade das autorizacións); por outra banda, esas condicións xerais non innovan propiamente o ordenamento xurídico, non tendo a vocación de permanencia propia das normas, limitándose a establecer uns criterios mínimos de carácter provisional para a tramitación das solicitudes que se presenten en tanto non se modifica a ordenanza actual; esas condicións xerais, ademais, non terán carácter erga omnes (limitando a súa eficacia a esas solicitudes, e sen afectar por tanto ás autorizacións concedidas con anterioridade).

2º) Procedemento seguido na elaboración da instrución:

Constan no expediente os informes favorables dos servizos municipais, sendo a competencia para a súa aprobación da instrución corresponde á Alcaldesa en virtude do artigo 21 da LBRL.

3º) Contido das condicións xerais de autorización de terrazas de veladores establecidas na instrución:

En canto á fixación dos requisitos concretos para a instalación das terrazas, e dadas as limitacións propias dunha instrución, na súa elaboración empregáronse os seguinte criterios:

- En canto ao tipo de establecementos que poderán solicitar a autorización de instalación de terrazas de veladores, recóllense como tales os establecementos de restauración (restaurantes, bares e cafeterías) definidos no apartado II.2.5 do Anexo do catálogo de espectáculos públicos, actividades recreativas e establecementos abertos ao público de Galicia; sen prexuízo doutros establecementos previo estudio do caso concreto.

- Ante a peculiar situación actual de incremento da demanda destas instalacións por parte dos establecementos de actividades recreativas por mor da situación xerada pola pandemia de COVID 19, óptase por unha interpretación ampla das posibilidades de instalación de terrazas de veladores, sempre dentro do marco legal vixente, e ante a inexistencia actual de restricións normativas específicas que, no seu caso, poderían establecerse a través da modificación da ordenanza actual.



I. Condicións xerais para a concesión de autorizacións de ocupación de vías e espazos públicos con terrazas de veladores.

1. Requisitos xerais para a concesión de autorizacións de ocupación de vías e espazos públicos con terrazas de veladores:

Con carácter xeral, o outorgamento de autorizacións de ocupación de vías e espazos públicos suxeitarase aos seguintes requisitos:

a) As autorizacións unicamente poderán ser solicitadas por establecementos dedicados ás actividades recreativas seguintes:

a.1) Establecementos de restauración (restaurantes, bares e cafeterías) definidos no apartado III.2.5 do anexo do Catálogo de espectáculos públicos, actividades recreativas e establecementos abertos ao público da Comunidade Autónoma de Galicia, aprobado polo Decreto 124/2019, do 5 de setembro, ou establecementos equivalentes na norma que o poida substituír no futuro.

a.2) Establecementos de actividades de lecer definidos no apartado III.2.7.4 (cafés-espectáculo) do devandito anexo.

b) Os establecementos deberán contar co seu preceptivo título habilitante, conforme á lexislación vixente en materia de espectáculos públicos e actividades recreativas, e atoparse ao corrente nas súas obrigas económicas co Concello de Marín.

c) A autorización outorgarase exclusivamente para as vías ou espazos públicos lindeiros coa fachada do local. Non obstante, admitirase excepcionalmente a localización na marxe oposta en vías peonís ou de circulación restrinxida, así como en espazos públicos libres diferentes a vías (tales como os situados en prazas, parques ou xardíns) inmediatamente lindeiros ao viario ao que dea fronte a fachada do local. A aplicación desta excepción requirirá a concorrencia dos seguintes requisitos:

i) Que non sexa posible a instalación da terraza na mesma marxe do local, ou que, sendo posible, a instalación na marxe oposta mellore as condicións de uso común xeral da vía pública.

ii) Que na marxe oposta non exista outro establecemento de actividades recreativas que poida instalar terrazas de veladores.

iii) Non se admitirá esta excepción en vías de tránsito de vehículos non restrinxido, salvo en casos debidamente xustificadas.

iv) A autorización en parques e xardíns, deberán situarse en zonas nas que existan pavimentos duros, quedando expresamente prohibida a colocación de mesas e cadeiras noutras superficies, e sen que en ningún caso poidan impedir o normal desenvolvemento das actividades propias das parques e prazas como espazos de lecer e paseo dos cidadáns.



d) Non se admitirá a colocación en vías públicas de terrazas de veladores polos establecementos que non linden directamente coa vía pública, tales como locais en plantas superiores á planta baixa ou locais interiores en galerías ou prazas interiores; salvo supostos excepcionais debidamente xustificados.

e) Nos supostos de edificacións lindeiras abandonadas ou en ruínas, poderase ocupar o espazo da súa fachada, sempre e cando estén aseguradas as condicións de seguridade e sen prexuízo dos posibles terceiros titulares.

2. Definicións.

a. Actividade hostaleira: Son aqueles establecementos, públicos ou privados, que se encadran entre os locais de hostalería recollidos na normativa sectorial de turismo da Comunidade Autónoma de Galicia.

b. Terraza ou velador de hostalería: É o conxunto de mesas, cadeiras e calquera outro mobiliario ou instalación -esteá ou non homologada- que, sendo propios deste tipo de instalacións, estean situadas en dominio público ou en espazos privados de uso público, e sirvan de complemento temporal ou continuo a un establecemento legalizado de hostalería, así como cando forme parte dun establecemento maior, sempre que a súa licenza, comunicación previa ou declaración responsable recolla expresamente a autorización de funcionamento da hostalería complementaria.

Poden contar cos seguintes elementos:

- **Toldos:** Instalación auxiliar dunha terraza con estrutura ancorada á fachada, podendo ter cerramentos extensibles e flexibles.

- **Toldos Telescópicos:** Estructuras con toldos a dúas augas, móbiles mediante a instalación de rodas o fixas e mediante xardineiras a modo de contrapeso.

- **Tarimas ou taboados:** Instalación auxiliar a unha terraza con carácter móbil ou facilmente desmontable, con estrutura ancorada ou non ao pavimento, cuxo fin é eliminar barreiras de pendente, ou desnivel derivados das especiais características dos espazos urbanos susceptibles de ocupación, permitindo o acceso ou a nivelación do solo para a ocupación de conformidade co disposto na normativa de aplicación.

- **Paraventos:** Pantallas de diversas formas, tamaños e materiais, a miúdo lixeiros e translúcidos, que serve para protexer do vento.

- **Xardineiras:** Recipientes, xeralmente de forma rectangular, que serven para poñer macetas con plantas ou para colocar plantas de adorno directamente na terra.

- **Separadores:** Elementos delimitadores conformados por macetas, bolardos, etc...

3.Expositores: Elementos móbiles e desmontables vinculados ás terrazas ou, no seu caso, como extensión da actividade comercial principal a espazos de uso público, que se dispoñen no



exterior de establecementos de hostalería, comerciais ou de servizos, tales como caixóns, plantas, armazóns no chan para o apoio de cartelería ou propaganda, armarios expositores ou similares.

3. Requisitos específicos de localización:

a) Con carácter xeral, as terrazas de veladores en espazos e vías públicas situaranse conforme ás seguintes regras:

a.1) En rúas abertas ao tránsito permanente de vehículos, as terrazas só poderán colocarse nas beirarrúas. Non obstante o anterior, con carácter excepcional, e con vixencia limitada á das restricións ás actividades de hostalaría derivadas das situacións de estado de alarma ou, no seu caso, de emerxencia sanitaria ocasionada pola COVID 19, as terrazas de veladores poderán colocarse en zonas de estacionamento libre ou regulado (excluídas as zonas de carga e descarga, as reservadas a estacionamento de vehículos de servizos públicos e as prazas reservadas para persoas de mobilidade reducida).

Nestes casos a ocupación limitarase á lonxitude da liña de fachada do local, e a instalación da terraza deberá realizarse cunha estrutura desmontable que se manterá de forma permanente durante o período de vixencia da licenza.

Esta excepción será aplicable tanto para os establecementos que non poidan instalar terrazas de veladores nas beirarrúas por aplicación das condicións xerais establecidas nesta instrución, como para a ampliación do veladores xa autorizados, ou autorizables ao abeiro desta instrución.

Esta excepción non se admitirá nas rúas integrantes do viario principal e arterial que, por razóns de seguridade viaria, debido á súa maior densidade e intensidade de circulación. Igualmente, poderá denegarse en rúas integrantes do viario local cando do informe da Policía Local se deduza que polas circunstancias de tráfico da vía a autorización pode implicar un risco para a seguridade viaria ou das persoas.

a.2) En rúas peonís: poderán situarse na calzada ou na beirarrúa, cando esta exista. Non obstante, a colocación na beirarrúa só será admisible nos supostos nos que a situación na calzada non permita gardar o espazo libre de calzada previsto no apartado c), e sempre e cando o ancho da beirarrúa permita gardar as distancias previstas no apartado b).

b) Distancias nas terrazas situadas en beirarrúas: as terrazas situadas en beirarrúas colocaranse a unha distancia mínima de 1,80 metros da fachada, e a 0,40 metros do límite entre o bordo da beirarrúa e a calzada. Excepcionalmente, en zonas urbanas consolidadas, admitiranse estreitamentos puntuais cando non sexa posible respectar a norma xeral de 1,80 metros, sempre que a anchura libre de paso resultante non sexa inferior a 1,50 metros.

c) Distancias en calzadas peonís e/ou de circulación restrinxida de vehículos: as terrazas en calzadas peonís ou de circulación restrinxida de vehículos deberán respectar a distancia mínima a fachada de 1,80 ou, no seu caso, 1,50 metros prevista no apartado b), deixando ademais o seguinte espazo libre na calzada:



- En calzadas de sentido único: 3,5 metros
- En calzadas de dobre sentido 6 metros

O espazo libre de calzada previsto nos apartados anteriores poderá incrementarse nos supostos nos que, polas características do tramo da vía onde se proxecta a terraza, sexa necesario para garantir o acceso de vehículos de emerxencias, carga e descarga ou de prestación de servizos públicos. En todo caso, nas esquinas das rúas deixarase o espazo libre necesario para permitir o xiro dos vehículos. En ningún caso se autorizarán veladores na parte central das rúas peonís ou de circulación restrinxida de vehículos. Non obstante o anterior, non será preciso deixar o espazo libre de calzada de 3,5 metros no caso de rúas peonís nas que non sexa posible o acceso de vehículos, pola existencia de barreiras físicas permanentes que impidan a súa entrada.

d) Nos soportais deberá deixarse unha distancia libre á fachada mínima de 1'80 metros, ou de 1,50 metros nos supostos previstos no apartado b).

No caso de que a distancia á fachada sexa menor de 1'80 m ou 1,50 metros, as terrazas colocaranse, de ser posible, na zona exterior, a partir da columna do soportal, respectando en todo caso as distancias previstas nos apartados b) – cando a zona exterior ao soportal sexa unha beirarrúa–ou c) – cando a zona exterior ao soportal sexa unha calzada peonil ou de circulación restrinxida–segundo proceda.

e) As distancias a fachadas previstas nos apartados b), c) e d) anteriores establécense co fin de deixar libre un itinerario peonil accesible entre os veladores e a liña de fachada.

Non obstante o disposto nos ditos apartados, de forma excepcional, en zonas urbanas consolidadas nas que non sexa posible cumprir este requisito, poderá autorizarse, incluso en ambas as marxes da rúa, a colocación da terraza adxacente á fachada, sempre que se coloque un paramento desmontable que converta a terraza en detectable para as persoas con dificultade visual e permita a estas persoas continuar sen dificultade o seu itinerario.

Esta excepción fundaméntase no disposto nos artigos 1.3 e 2.2 do anexo da Orde VIV/561/2010, de 1 de febreiro, que expresamente prevén que nas zonas urbanas consolidadas, cando non sexa posible o cumprimento das condicións de accesibilidade, se formularán solucións alternativas que garantan a máxima accesibilidade, en relación co artigo 33.2 do dito anexo, no que se establece que as terrazas de bares e instalacións similares dispoñibles en áreas de uso peonil deberán ser detectables, evitando calquera elemento ou situación que poida xerar un perigo para as persoas con discapacidade visual.

En todo caso o deseño da situación dos veladores dará cumprimento á normativa vixente en materia de accesibilidade, en particular ao disposto no citado artigo 33.2.

Nestes supostos, co fin de garantir a accesibilidade ás mesas e cadeiras, a superficie ocupada deberá ampliarse establecendo un corredor intermedio en cada terraza que permita o acceso dos clientes e persoal do establecemento ás mesas, cunha anchura mínima de 0,50 metros. Nas zonas peonís ou de circulación restrinxida de vehículos, cando se autorice a colocación



das terrazas adxacentes á fachada, o itinerario peonil accesible discurrirá polo espazo libre da calzada de 3,50 metros previsto no apartado c), sen necesidade de incrementar o seu ancho.

f) En zonas peonís ou de circulación restrinxida de vehículos en prazas públicas e espazos abertos, a superficie máxima de ocupación con terrazas de veladores non poderá ser superior ao 50 % do espazo libre susceptible de ocupación. O espazo libre susceptible de ocupación obterase descontando as zonas verdes, mobiliario urbano, zonas de xogo infantís, escavas e arborado. En todo caso, deberá deixarse libre en todo momento un itinerario peonil de 1,80 metros de ancho, e nas prazas abertas ao tránsito de vehículos, ademais, os itinerarios necesarios para o paso de vehículos con 4 metros de ancho libre para cada sentido da circulación.

O espazo libre nas prazas públicas deberá situarse a unha distancia máxima de 10 metros das fachadas dos edificios que dean fronte á praza, co fin de permitir a utilización de vehículos con autoescaleira contra incendios.

Non obstante, por acordo de Alcaldía poderán delimitarse os espazos dispoñibles para ocupación en prazas e outros espazos públicos cunha superficie de ocupación inferior á prevista no apartado anterior. O acordo deberá motivar a necesidade da redución da superficie máxima susceptible de ocupación para garantir o mantemento do uso público xeral da praza e a súa accesibilidade, tanto para peóns como, no seu caso, vehículos, ou ben por necesidades derivadas da protección do patrimonio cultural ou ambiental ou para a garantía de funcionamento dos servizos públicos.

g) Nos supostos de vías peonís ou de circulación restrinxida nos que existan establecementos en ambas as marxes da vía e a anchura das rúas non permita a instalación de terrazas en ambas as marxes cumprindo as condicións establecidas nesta instrución, poderá autorizarse a colocación da terraza de veladores por parte de dous ou máis establecementos de forma rotatoria en días ou períodos de tempo alternos. A terraza colocarse na marxe da rúa que corresponda en cada quenda. Para a aplicación desta excepción, os establecementos interesados deberán solicitar conxuntamente a autorización, presentando cada un deles a documentación prevista no apartado 9 para cada unha das terrazas e un documento conxunto no que se manifeste a conformidade coa utilización por quendas da rúa, no que se indicará a distribución temporal para a súa colocación, conforme ao modelo normalizado que aprobe a Alcaldía.

4. Prohibicións de localización:

Os veladores respectarán o disposto no Regulamento xeral de circulación e normas complementarias de aplicación, en todo o relativo á visibilidade, distancia a cruzamentos e esquinas de beirarrúas sen poder entorpecer, en ningún caso, o paso de persoas ou vehículos, mesmo en rúas peonís. Por conseguinte, non poderán situarse en ningún caso ante ou sobre:

- Portais de acceso a edificios ou locais comerciais.
- Pasaxes permanentes ou entradas de carruaxes.
- Reservas de vía pública.



- Paradas de vehículos de servizos públicos ou oficiais.
- Elementos urbanos cuxo uso puidese verse dificultado en caso de emerxencia pola colocación de veladores, tales como bocas de hidrantes contra incendios e outros.
- A menos de 1,50 metros doutros servizos autorizados, como cabinas de teléfonos, caixas de correos, quioscos, caixas de protección de edificios, caixa de contadores xerais desde a rúa, etc., así como de elementos de mobiliario urbano de uso público, tales como bancos. No caso das papeleiras, a distancia mínima será de 1 metro.
- A menos de 1,50 metros de inmobles declarados bens de interese cultural e de esculturas ou outros elementos ornamentais de mobiliario urbano análogos.

Tampouco poderán impedir a visión frontal de escaparates de locais comerciais, rótulos de despachos profesionais e instalacións similares de terceiras persoas, agás nos supostos nos que se autorice a ocupación polo establecemento afectado.

Agás que fronte ao establecemento poida deixarse un espazo libre mínimo de 4,00m.

5. Requisitos xerais dos elementos integrantes das terrazas de veladores:

As terrazas de veladores poderán integrarse polos seguintes elementos de mobiliario urbano:

- a) Os veladores, compostos por unha mesa e un máximo de catro cadeiras.
- b) Elementos de sombra, como antucas, parasois ou pérgolas.
- c) Elementos de climatización, como calefactores ou ventiladores
- e) Paramentos desmontables, tales como paraventos, enreixados, sebes en macetas, plantas ou outros elementos calquera que delimiten en liña vertical a zona total ou parcialmente ocupada.
- f) Tarimas, nos supostos en que sexan necesarias pola inclinación da rúa ou espazo público.

Non poderán realizarse instalacións nin colocarse mobiliario, elementos decorativos ou revestimentos de solo que non estean incluídos expresamente na licenza da terraza.

A colocación de toldos ancorados á parede debe tramitarse mediante unha solicitude independente de licenza urbanística ou a presentación de comunicación previa ou declaración responsable, segundo determine a normativa urbanística.

Os elementos de mobiliario urbano que ocupen o espazo autorizado para a instalación da terraza deberán ser homoxéneos, tanto en cor como en deseño, sen que se permitan cores nin modelos diferentes na mesma terraza.

Non poderá colocarse ningún tipo de cartel, carteleira ou valado publicitario nas terrazas de veladores, agás nos supostos e cos requisitos previstos na normativa urbanística de aplicación.



En termos xerais o mobiliario autorizado para a terraza deberá reunir unhas características específicas para a súa función, de modo que sexan amoreables, de material resistente, de fácil limpeza, de deseño atractivo e de boa calidade, prohibíndose especificamente materiais de estrutura de plástico ou PVC con escasa presenza estética ou configuración extremadamente básica.

As cores do mobiliario das terrazas serán neutras, quedando prohibidas as cores primarias ou composicións de colorido estridentes ou rechamantes, preferentemente se utilizarán cores negro, branco ou gris metalizado ou similares. En todo caso, deberán observarse as determinacións estéticas que estableza o correspondente planeamento urbanístico.

O mobiliario da terraza deberá estar dotado de proteccións acústicas eficaces nos seus apoios (tales como elementos de goma ou similares), co fin de minimizar as molestias polo ruído.

Os elementos mobiliarios integrantes da terraza de veladores deberán dispoñer do correspondente marcado CE, en lugar visible e lexible, nos casos en que esta sexa esixible conforme á normativa europea de fabricación ou importación dos ditos elementos.

En todo caso será de aplicación o disposto na normativa xeral e municipal aplicable en materia de ruídos e vibracións vixente en cada momento, a cal poderá regular condicións específicas e medidas correctoras adicionais para evitar a propagación cara á terraza exterior dos establecementos dos ruídos e vibracións que se produzan no seu interior, así como dos que poidan producir os propios elementos integrantes da terraza de veladores.

As ditas condicións figurarán na propia licenza da terraza de veladores, ou poderán introducirse mediante expediente de imposición de medidas correctoras adicionais. Non se permitirán ancoraxes ao pavimento nin a fachadas ou mobiliario urbano de ningún elemento de terraza. Non se admitirá a colocación, na zona autorizada para veladores, de calquera tipo de aparatos de reprodución de imaxe e son.

O establecemento deberá dispoñer de extintores homologados a menos de 15 metros de distancia de calquera punto ocupable da terraza de veladores. Os extintores terán unha eficacia mínima de 21A – 113 B e situaranse en lugares de acceso doado, podendo situarse no interior do establecemento sempre que se respecte a distancia máxima indicada. O titular da licenza deberá dispoñer de modo permanente dun contrato vixente de mantemento dos extintores con empresa autorizada. O incumprimento desta condición poderá dar lugar á declaración de caducidade da autorización.

6. Condicións específicas dos veladores:

a) O módulo tipo (módulo por mesa) do velador constitúe unha mesa baixa e un máximo de catro cadeiras.

As dimensións totais mínimas do espazo ocupado polos veladores, en función do número de cadeiras, deberán ser as seguintes:



Mesa con 4 cadeiras: 1,80 X 1,80 m

Mesa con 3 cadeiras: 1,80 X 1,25 m

Mesa con 2 cadeiras: 1,80 X 0,70 m

O diámetro máximo de mesa será de 70 cm (ou un lado máximo de 70 cm en mesa cuadrangulares ou rectangulares) cunha superficie equivalente de ocupación máxima de 3,25 m².

b) Se por razóns de dimensións do espazo dispoñible non fose posible a instalación de veladores de módulo tipo, poderán instalarse mesas altas ou barricas con dúas banquetas, cun diámetro máximo de 50 centímetros (ou un lado máximo de 50 cm en mesas cuadrangulares ou rectangulares).

A lonxitude mínima da ocupación necesaria no caso de banquetas enfrontadas será de 1,70 m, cunha superficie equivalente de ocupación máxima de 0,85 m².

No caso de banquetas dispostas en ángulo recto, a ocupación mínima necesaria será de 1,10 X 1,10 metros.

7. Condicións específicas dos elementos de sombra.

As antucas, parasois e pérgolas serán de material téxtil ou similar, lisos e dunha soa cor, preferiblemente en cor negra, dando uniformidade á terraza (seguindo os modelos propostos no anexo de modelos de mobiliario de terrazas e veladores para harmonización dos mesmos. A proxección en planta dos parasois ou antucas non superará os límites do espazo autorizado á terraza.

Os parasois e antucas deberán ter un único punto de apoio, de doada manobra. A altura mínima dunha instalación illada será de 2,20 metros e a máxima libre será de 3,00 metros.

En ningún caso estas instalacións impedirán a visibilidade de sinais de circulación nin de establecementos lindeiros.

Excepcionalmente poderá autorizarse en prazas ou emprazamentos similares o modelo de toldo telescópico que figura no anexo de modelos de mobiliario de terrazas e veladores para harmonización dos mesmos.

8. Condicións específicas dos elementos de climatización.

Os elementos de climatización da terraza de veladores deberán cumprir a normativa técnica esixible en cada caso, debendo reunir as condicións de seguridade esixibles, sen que poidan producir ningún tipo de ruído, emisión ou vibración molesta nin ningún tipo de risco para as persoas. A súa colocación e instalación deberá realizarse observando en todo momento as recomendacións ou instrucións técnicas do fabricante.



Non se admitirán instalacións de carácter fixo, debendo retirarse co resto de elementos integrantes da terraza de veladores.

Os elementos de climatización deberán harmonizar esteticamente co resto de elementos do velador e coa contorna, e deberán situarse sempre dentro do perímetro máximo de ocupación da terraza de veladores.

As estufas, calefactores ou ventiladores que non se apoien no solo deberá deixar unha altura libre de paso mínima de 2,20 metros.

Os elementos de climatización deberán situarse a unha distancia mínima de 2 metros das fachadas e de calquera elemento de mobiliario urbano da vía ou espazo público.

Non se admitirá a instalación de máis dun aparato por cada catro mesas autorizadas.

9. Condicións específicas para a colocación de paramentos desmontables, tarimas e estruturas de protección.

1. Os paramentos desmontables deberán observar as normas estéticas previstas para o resto de elementos integrantes da terraza así como as específicas que sexan de aplicación conforme á ordenación urbanística, debendo observar, en todo caso, as condicións de seguridade adecuadas.

A instalación destes elementos terá carácter obrigatorio nos supostos excepcionais nos que a terraza se acaroe ás fachadas en rúas peonís ou de circulación restrinxida, co fin de facer detectable a terraza para as persoas con dificultade visual.

Os paramentos desmontables terán unha altura mínima de 0,70 metros e máxima de 1,50 metros, debendo ser detectables a unha altura mínima de 0,15 m medidos dende o nivel do solo.

2. A instalación de estruturas de protección deberá realizarse nos supostos excepcionais de ocupación de espazos libres de estacionamento en calzadas. Estas estruturas deberán estar pechadas por tres lados –o lado da calzada e as zonas anterior e posterior á ocupación – protexendo e delimitando o espazo ocupado, agás no suposto de instalación entre escavas, nos que só será esixible no lado da calzada. Deberán observar os criterios xerais de estética e adaptación á contorna previstos nesta instrución para o resto de elementos integrantes da terraza do velador, así como as alturas mínimas de 0,70 metros e máxima de 1,50 metros previstas no parágrafo anterior para os paramentos desmontables.

En todo caso, as estruturas de protección deberán dispoñer do correspondente marcado CE cando este sexa esixible. Cando exista desnivel entre a beirarrúa e a calzada, deberá colocarse unha tarima ao nivel da beirarrúa co fin de mellorar a accesibilidade aos veladores.

3. Permitirase a colocación de tarimas desmontables cando a inclinación da rúa ou espazo público o aconselle.



10. Condicións de utilización e mantemento das terrazas de veladores.

Os titulares das autorizacións deberán manter as instalacións e cada un dos elementos que os compoñen nas debidas condicións de limpeza, seguridade e ornato, evitando a produción de molestias á veciñanza.

A requirimento dos axentes da autoridade, os veladores instalados con licenza terán que ser retirados de forma temporal e inmediata polos donos, encargados ou responsables dos establecementos, cando sexa necesario para a seguridade das persoas ou para garantir o tránsito de persoas e vehículos.

11. Horario.

1. Sen prexuízo da aplicación preferente dos horarios máis restritivos que poidan establecer as autoridades sanitarias durante o estado de alarma ou o estado de emerxencia sanitaria derivado da pandemia da COVID 19, o horario de instalación e retirada das terrazas e veladores, así como a súa posible ampliación e redución, será o establecido na Orde de 23 de outubro de 2020 pola que se determina o horario de apertura e peche dos establecementos abertos ao público e de inicio e remate dos espectáculos públicos e das actividades recreativas.

2. Os veladores e os seus elementos retiraranse ás horas indicadas, podendo únicamente ficar amoreados no espazo público adxacente ao local durante o tempo estritamente necesario para completar as operacións de montaxe e desmontaxe. En ningún caso estes amoreamentos poderán xerar unha barreira que interfira na circulación, no tránsito peonil, nas condicións de accesibilidade e uso da vía ou espazo público, nin nos percorridos de evacuación do local. Os veladores e os seus elementos gardaranse no seu interior ou en locais anexos destinados para tal fin.

Sen prexuízo de que se poida autorizar o seu amoreamento en prazas, praciñas, parques ou xardíns.

12. Aplicación dos criterios recollidos nesta instrución.

Os criterios recollidos nesta instrución serán de aplicación ás solicitudes de licenzas que se formulen a partir da súa publicación.

Igualmente, aplicaranse aos expedientes que se atopen trámite. Non obstante, non se esixirá aos interesados a presentación de documentación adicional á xa presentada agás que sexa imprescindible para a resolución do procedemento.



Anexo de modelos de mobiliario de terrazas e veladores para harmonización dos mesmos

ANEXO cos MODELOS DE MOBILIARIO PARA TERRAZAS E VELADORES

1. PARAVENTO PARA SEPARACIÓN DA TERRAZA CO BORDE DA CALZADA:



Dimensións:
Altura xardineira: 90 cm
Altura con cristal: 140 cm
Largo: 100 cm
Ancho: 30 cm

Paravento con xardineira exterior. Fácil de limpar e desinfectar. Facilmente transportable debido a que pode incorporar rodas.

CARACTERÍSTICAS:

Estrutura: Xardineira de chapa galvanizada antióxido gris escuro. Con desaugadoiro incluído. Pode incorporar rodas.

Deberá de garantir a súa seguridade, estabilidade e resistencia, de modo que non resulte posible que se desprace accidentalmente cara a calzada.



Mércores, 19 de maio de 2021

Núm. 93

2. PARAVENTO DELIMITADOR DE TERRAZA SEN XARDINEIRA:



Dimensións:
Altura máxima con cristal: 150 cm
Largo: 70 - 100 cm

Estrutura de aluminio con paneis de aluminio lacados en gris escuro na parte inferior e metacrilato transparente na parte superior.

Deberá de garantir a súa seguridade, estabilidade e resistencia.

Pode verificar a integridade deste documento no seguinte enderezo:
<https://sede.depo.gal>
Código seguro de verificación: I05DHD2TXW5H98UX



Mércores, 19 de maio de 2021

Núm. 93

3. PARAVENTO DELIMITADOR DE TERRAZA CON XARDINEIRA:



Dimensións:
Altura: 160 cms.
Fondo: 30 cms.
Anchos: 100, 150 e 200 cms.
Macetero: Altura: 50 cms.

Paravento con xardineira de aceiro galvanizado cun proceso de cincado e un lacado ao forno. Opción de dobre roda con freo. O módulo de xardineira está unido á mampara de metacrilato, para dar solidez e resistencia ás fortes rachas de vento.

Características:

- α) Estrutura de aceiro galvanizado.
- β) Panel superior de Metacrilato Plexiglas 8 mm.
- χ) Axuste do Metacrilato con goma Negra.
- δ) Rodas dobres de Goma para su desprazamento, fixas e con freo.



Mércores, 19 de maio de 2021

Núm. 93

4. TOLDOS PARA PLAZOLETA



Dimensións:

Altura: 260 cms a parte m
baixa.

Fondo: 300 cm de saliente
cada lado.

Anchos: 600 cm de fachada

Toldos telescópicos: son estruturas con toldos a dúas augas, en aceiro galvanizado e posteriormente lacado en negro, con forma de portería (a un agua o a dos augas). Con lona acrílica en cor negro, repelente á sucidade e tratamento antiputrefacción.

Son móbiles mediante a instalación de rodas o fixas e mediante xardineiras a modo de contrapeso.

Características técnicas:

As porterías son estruturas de aceiro, lacado e cincado o galvanizadas en cor negro.

Habitualmente de perfís de 70mm x 70mm o 100mm x 100mm; e entre 2mm - 3mm de espesor.

Con postes suxeitos á superficie por pletinas, casacas ou contrapesos tipo xardineiras.

As porterías poden levar toldos cofres auto protexidos e extensibles de grandes saídas, por ambos lados ou só por un.

Deberá de garantir a súa seguridade, estabilidade e resistencia.



5. PARASOLES:



Parasol excéntrico rectangular, cor negro, 3x4 m, con estrutura robusta de aluminio recuberto con pintura en cor negro. Inclínable, pregable E rotativo 360°
Base Tipo Lastre con losetas especiais de formigón.



Parasol centrado rectangular, cor negro, 3x4 m, con estrutura robusta de aluminio recuberto con pintura en cor negro. Inclínable, pregable E rotativo 360°
Base Tipo Lastre con losetas especiais de formigón.



Mércores, 19 de maio de 2021

Núm. 93

6. MESAS



Mesa cadrada con estrutura de aluminio anodizado e tableiro de MDF con prancha de aceiro inoxidable repulsado.

Os tubos das patas son de 25x1,5 mm e a medida da mesa es 70x70x70 cm.

Inclúe tacos de goma, para que podan ser apiladas.

Estrutura moi lixeira que facilita a labor de montaxe e recollida diaria.



Mesa cadrada con estrutura de aluminio lacada en cor negro. Tableiro compacto fenólico de 10 mm de grosor en cor branco.

Medidas 750(Alto) x 700(Ancho) x 700(Fondo)mm.



Mércores, 19 de maio de 2021

Núm. 93

7. CADEIRAS



Cadeira de aluminio e polipropileno de cor negro.



Cadeira apilable fabricada en polipropileno de cor negro con patas en aluminio anodizado en mate.

